



Departement für Infrastruktur, Energie und Mobilität Graubünden

Departament d'infrastructura, energia e mobilitad dal Grischun

Dipartimento infrastrutture, energia e mobilità dei Grigioni

Departament d'infrastructura, energia e mobilitad dal Grischun
Ringstrasse 10
7001 Cuira

Telefon +41 81 257 36 14
www.diem.gr.ch
info@diem.gr.ch

Orlando Nigg – collavuratur giuridic
Telefon direct +41 81 257 36 18
orlando.nigg@diem.gr.ch

Departament d'infrastructura, energia e mobilitad dal Grischun,
Ringstrasse 10, 7001 Cuira

Als adressats
tenor la glista separada

Cuira, ils 28 d'avrigl 2021

Consultaziun en connex cun la participaziun a la Cunvegna interchantunala davart las acquisiziuns publicas (CIAP) revedida e cun la Lescha introductiva tar la Cunvegna interchantunala davart las acquisiziuns publicas (LitCIAP)

Preziadas dunnas, stimads signurs

A chaschun da lur radunanza speziala dals 15 da november 2019 han ils chantuns approvà unanimamain la Cunvegna interchantunala davart las acquisiziuns publicas (CIAP) revedida. Qua tras vegn tschentà in ulteriur crap da fundament impurtant per armonisar il dretg da las acquisiziuns en Svizra. Cun la realisaziun aspirada da la CIAP vegnan unifitgadas anc pli fermamain en cumparegliaziun cun oz las prescripziuns en il dretg da las acquisiziuns chantunal che vegn applitgà en ils chantuns, en las citads ed en las vischnancas. Plinavant gida la CIAP revedida ad armonisar il dretg uschè lunsch sco pussaivel cun la Lescha federala davart las acquisiziuns publicas (LAP) revedida che reglescha da nov las acquisiziuns da la Confederaziun e ch'è entrada en vigur il 1. da schaner 2021.

Ultra d'armonisar ils differents reglaments da las acquisiziuns dals chantuns e da la Confederaziun e da realisar a medem temp la Cunvegna OMC davart las acquisiziuns publicas revedida il 2012 èn las finamiras principalas da la CIAP da modernisar e flexibilisar la legislaziun da la surdada. Plinavant s'orientescha la pratica da cumpra dal maun public pli fitg a finamiras da persistenza ed a la concorrenza da la qualitat empè dal pretsch e resguarda pli savens soluziuns innovativas. Uschia sa manifesteschan anc meglier las fermezzas da noss mastergn e commerzi indigen.

Las paucas differenzas tranter la CIAP e la LAP vegnan chaschunadas principalmain tras prescripziuns legalas surordinadas ch'ils chantuns e la Confederaziun ston resguardar en lur legislaziuns. Sin fundament da las prescripziuns da la Lescha federala davart il martgà intern (LMI) vegnan ils chantuns uschia per exempel ad applitgar vinavant il princip dal lieu d'origin, entant ch'è decisiv per la Confederaziun il princip dal lieu da prestaziun.

Per che la CIAP revedida possa entrar en vigur en il chantun Grischun è necessaria ina participaziun explicita. Quella è object da quest project da consultaziun. La CIAP reglescha da nov l'entir dretg da las acquisiziuns publicas, tge che ha per consequenza ch'i na dovra pli nagin dretg material da las acquisiziuns sin plaun chantunal. Ils decrets existents (lescha ed ordinaziun da submissiun) ston perquai vegnir abolids. Il spazi d'agir per atgnas reglamentaziuns sa restrenscha a tschertas disposiziuns executivas. Ils chantuns n'han en spezial nagina libertad d'adattar singuls puncts da la CIAP e d'als remplazzar cun atgnas reglamentaziuns, uschenavant che la CIAP na prevesa quai betg explicitamain. Da princip signifitga quai: igl è sulettamain pussaivel da sa participar a la CIAP revedida, sch'ella vegn acceptada cumpletamain. La CIAP revedida ha differents avantatgs tant per ils posts d'acquisiziun sco era per ils purschiders, uschia ch'i fa senn da participar ad ella il pli prest pussaivel.

En vista a la situaziun è vegnida elavurada la LitCIAP. Sco quai ch'il titel tradescha gia sa tracti d'ina (curta) lescha introductiva. Questa lescha s'orientescha fermamain al model d'ina lescha da participaziun da la Conferenza svizra da las directuras e dals directurs da construcziun, da planisaziun e da l'ambient (CCPA). Qua tras duess vegnir tegnì quint da l'idea da l'armonisaziun er en il rom dal dretg d'execuziun chantunal. En il senn d'ina execuziun uschè omogena sco pussaivel dal nov dretg da las acquisiziuns elavuran la Confederaziun, ils chantuns e las vischnancas plinavant in mussavia cuminaivel davart las acquisiziuns sco agid practic impurtant. Quel vegn ad esser avant maun a partir da l'atun 2021. Il chantun Grischun è medemamain represchentà en questa gruppa da lavur.

Tut ils documents da consultaziun chattais Vus en furma digitala sin www.gr.ch → Publicaziuns → Consultaziuns → Consultaziuns currentas. Quai èn:

- in messadi da model tar la CIAP 2019 (incl. il text da la cunvegna)
- ina preschentaziun sinoptica da la CIAP 2001 e da la CIAP 2019
- il sboz da la decisiun da participaziun a la CIAP 2019
- il sboz da la LitCIAP
- il rapport explicativ
- la glista d'adressats da la consultaziun

Nus supplitgain Vus d'inoltrar Vossa posiziun fin ils **28 da fanadur 2021** sin via electronica ad info@diem.gr.ch. Per ulteriurs scleriments stat Orlando Nigg, manader dal Center da cumpetenzza per las acquisiziuns publicas (orlando.nigg@diem.gr.ch, 081 257 36 18), gugent a disposiziun.

Nus As engraziain per Vossa collavuraziun preziosa.

Amicabels salids
Departament d'infrastructura, energia
e mobilitad dal Grischun
Il schef:



Dr. Mario Cavigelli, president da la Regenza